

是死者邪善哉善哉愚生已大覺矣子知早覺可謂為曉事之生遠凶而近吉乎覺而不止也真道畢乎一旦得玉侯不若得仙人乎今行逢千斤之金萬雙之璧不若得明師乎帝王有愚臣億萬不若得一大賢明乎父母生百子而不肖不若生一子而賢乎一里百戶不好學不若近一大德乎萬目樓樓不若一大綱乎天下擾擾無不有若天獨神且聖乘氣而飛行乎凡物雖衆多不若一氣獨活人乎故今勅真人學者疾棄浮華能務核事求真道乎欲太吉者真若稱天乎天地無病而長悅喜真道奇殊方出祐人乎是以古者聖人常稱天不敢懈也故常獨吉也賢儒集策天道畢也各言一善而陰陽理神靈悅也災害悉伏不復發也所謂治得天心而祇臣絕也神哉為道自然術也善哉善哉愚生向不力問復無緣得知是也然子言是也學而不力問何從得日進乎行而不數移其足道何從得達乎學而不得明師知何從得發乎治國欲樂安之不得大賢事之何從得一

且而理乎善哉天師之言也然子已觀其微意矣故金城九重不如事一大賢也是故古者聖賢皆事明師以解憂患也故聖賢悉有師法也真人宜戒凡事自愛吉凶門戶可暗乎唯唯戒真人一言唯唯人所求而得者天以順其所求不負焉也勿復臨死而哭天泣地也是名為自求而得之反以罪天地是名為大逆之人也天不好也地不嬉也鬼神會不祐也所覓者獨當覓求而不得者耳夫萬物各得其所求何故自覓哉真人熟思吾言是實非也吾之文不誤也大口口萬不失一也今天乃惡之疾之故吾反覆道之雖上已言復戒真人於下也吾乃故使其復重樂下古之人深思之美之念之傳之寫之以相示勿匿之也天之戒書樂見發揚不欲見藏也唯唯行去

右集難人死當見覓與不所求得與不合國安危學達明師與不肖師

太平經卷之九十一 訓一
 拘校三古文法第百三十二
 請問天師之書乃拘校天地開闢以來前後賢聖之文河雒圖書神文之屬下及凡民之辭語下及奴婢遠及夷狄皆受其奇辭殊策合以為一語以明天道曾不煩乎哉不也為其遠煩而不通故各就其為作求善太平之宅於其所屬邑鄉主備其遠不能自致故為其立宅道上使其投異辭善奇策殊方於其中也因取中事傳持往付於上有德之君令其群臣共定案之以類相求上第一善者去其邪辭以為洞極之經名為天洞極政事迺後天地之病且悉除去也帝王之治且壹大安也承負萬萬世之災厄會且壹都去也然後萬物群神且無一可言而不復上白人惡於上天也故勅使其拘校之者迺天使吾下言也雖煩安得不力為之乎天下久書及人各言一或言十數而天下之疑事悉自解亦無大煩也但各居其處而言之傳持付上耳是名為天下集久集言而語以通達天地

太平經卷之九十

之意以通達天地之炁以除帝王災害以利
凡民及萬物莫不各得處其所者迺後天地
壹且大悅喜病壹除喜則祐帝王也今使無
事而長游也顧問天地何故一時使天下人
共集辭策及古今神聖之文以為洞極經手
善哉子之問然天地有劇病亂未嘗得善理
也故教示人使集議而共集出正語奇策以
除其病也故使其大共集言事也願請問天
地亂而有劇病何不更生善聖人乎力復生
後聖人迺無益何也噫真人愚哉吾聞前已
有言矣下賤闇之生積愚固固不能察察知
之真人尚迺言如此俗人何以可曉乎必且
互置吾文而更大忿天災害反且更大起而
不可救故天使子反覆問是也欲使吾更口
口具言耶諾諾吾親見遺焉是事下吾不敢
有所匿而忿天也行真人明聽為子條訣解
之更以上下悉說道之但安坐唯唯行古今
聖人有優劣各長於一事俱為天談地語而
所作殊異是故衆聖前後出者所為各異也
俱樂得天心地意去惡而致善而辭不盡同

壹合壹不大類相似故衆聖不能悉知天地
意故天地常有劇病而不悉除復欲生聖人
會復如斯天久悒悒於是故遺吾下具為其
語以告真人所以告真人者天上諸神言天
下有樂善欲稱天心者獨有真人耳故吾以
辭情告於真人也吾不同空語耳真人自知
之耶唯唯行子自知矣行所以拘校上古
神文中古神文下古神文者或上古神文未
及言之下古神文言之也因以類相從相補
共成一善辭故使集之也迺後神書天地意
可睹矣真人知之耶唯唯行子已解矣行上
古聖人失之中古聖人得之中古聖人失之
下古聖人得之下古聖人失之上古聖人得
之以類相從因以相補共成一善聖辭矣真
人知之耶唯唯行子可謂大解已行大聖或
有短失之中聖得之中聖失之小聖得之因
復以類相從因而相補共成一善聖辭矣真
人知之耶唯唯行子已解矣行大賢以短失
之中賢得之中賢失之小賢得之以類相從
因以相補共成一善賢辭矣真人知耶唯唯

行子已大解矣行帝王失之臣子得之臣子
失之庶民得之以類相從因以相補共成一
善辭矣真人知之耶唯唯行子已大解矣行
上老失之丁壯得之丁壯失之少者得之以
類相從因以相補共成一善辭矣真人知之
耶唯唯行子已解矣行男子失之女子得之
女子失之奴婢夷狄得之以類相從因以相
補共成一善辭矣真人知之耶唯唯行子已
知之矣行或上古文失之中古文得之或中
古文失之下古文得之以類相從因以相補
共成一善辭矣真人知之耶唯唯行子以大
解矣行或上古人失之中古人得之中古人
失之下古人得之以類相從因以相補共成
一善辭矣真人知之乎唯唯行子已解矣行
或上失之而下得之或下失之而上得之或
上下失之而中得之或中失之而上下得之
或天神文失之反聖文得之或聖文失之反
賢者文得之或賢者文失之而百姓文得之
或百姓文失之而夷狄得之或內失之反外
得之或外失之反內得之會有失之者會有

得之也故上下外內尊卑遠近俱收其文與要語而集其長短以類相補則俱矣然後文書及辭言宜都通具也真人知之耶唯唯行之子已知之矣天地出生凡事人民聖賢踐行萬物之屬各有短長各有不及各有所失故所為所作各異不同其大率要俱欲樂得天地之心而自安也當時各自言所為是也孔子以為真真也而俱反失天地之心故常有餘災毒或大或小相流而不絕是其明效也故生承負之責後生者病之日劇真人知之耶唯唯行子已解矣故今天遣吾下為上德道君更考文教吾都合之從神文聖賢辭下及庶人奴婢夷狄以類相從合其辭語善者以為洞極之經名為皇天洞極政事之文也迺後天地病壹悉除去也真人知之耶唯唯可核哉可核哉行真人已應曉事生已知之矣天已使子壽矣及上真人矣不敢不敢子自行得之非吾力也子為善天下無變故天愛之也不敢不敢令惡生但無忿天而已無敢可望也不嫌也唯唯請問合是衆類

以相從願聞其故意然善哉子難問天使之口口乎哉諾安坐為子分別道之也唯唯行假令正共說一甲字也是一事也正投衆賢明前是宜天下文書衆人之辭各有言說此一旦無管之文無管之言取中善者合衆人心第一解者集之以相徵明而起合於人心者即合於天地心矣以何明之願聞其談然凡人之行也考之於心及衆賢聖心而合而俱言善是也其應即合於天心矣考之於心自疑者考之於衆賢聖心下及小人心而言非者即凶天竟應之以凶也是即其明徵也故集此說以為經都合人心者是不合人心者非也子知之耶唯唯行凡書文凡事各自有本按本共以衆文人辭葉共因而說之如此矣俱合人心意者即合神祇不合人心意者不合神祇善哉善哉聞命矣今真人何故言聞命乎然行善正則得天心而生行惡失天心則凶死此死生即命所屬也故言聞命也善哉真人言是也吾無以加之也是故天正其言與文則言不正其言與文則凶是以

吾教真人拘校之也唯唯然後太平上皇之氣立出延年立來天文聖人之辭尚迺有短長故上皇之氣見固於邪解誤言未嘗得來也故天地後開闢以來未嘗有上皇之氣來助帝王治也今天欲都開出之故拘校文書也有餘一邪言輒餘一病餘一邪說誤文輒有餘一病餘十病餘百病餘千病餘萬萬病隨此餘邪言邪文誤辭為病天地病之故使人亦病之人無病即天無病也人半病之即天半病之人悉大小有病即天悉病之矣故使人病者迺樂覺之也而不覺故死無數也願聞以何以天病邪言邪辭邪文而有病乎噫子反更冥冥闕愚何哉行安坐為真人說之夫邪言邪文以說經道也則亂道經書道經亂則天文地理亂矣天文地理亂則天地病矣故使三光風雨四時五行戰闕無常歲為其凶年帝王為其愁苦縣官亂治民愁患飢寒此非邪文邪言所病邪如大用之迺到于大亂不治也子知耶唯唯夫邪文邪言誤辭以治國也日日得亂於是邪言邪

辭誤文為耳所共欺則國為之亂危臣為之枉法而妄為民為之困窮共汙天地之治亂天官大怒日教不絕也人哭泣呼冤亦不絕也子知之耶唯唯邪言邪文誤辭以治家也則父子夫婦亂更相憎惡而常鬪辯不絕遂為凶家子知之耶唯唯可怪哉見天師言誠怖惶愚生不深計不知是惡致此也真人獨愚日又矣夫俗人以為小事而不去之適不知此邪言邪辭邪文乃與天地為大怨也是適國家之大賊也百姓之烈鬼也寧可不一都投而力去之耶是故天愛上德之君恐其不覺悟復彼是大災故遣吾下具言之真人疾以文付之使其疾思天意可以自安不者天怒會不絕也故天不復使聖人語會不能悉都除其病故使天下人共壹言俱壹集古文考之也今天忿忿積志於是邪言邪文單言孤佞辭也今考是真人欲知之比若帝王慈惠夷狄數來害人也故發兵士萬萬往擊之病不怒也怒者功賜多不怒者帝王復考之今考邪文如此矣真人知之耶唯唯可畏

乎天下已正矣真人可謂已知之矣今急是孤辭一人邪言邪文邪辭天地今以是為大怨是帝王大賊也本治不安悉亂於是也故今斷之皆使集言集說集上書定安事迺天氣且壹悉得其所邪言邪辭迺且壹悉絕也滅亡也天從今以往且使人亦考之神亦且行考之但有日急非有懈時也真人知之耶唯唯愚生甚核子知核可無并見考唯唯愚生事事不及有重誦過於天地為天師憂念謹已見此邪文邪辭一人之言戒今願更見勅戒丁寧是正文之所到至戒善哉書文已比言矣子自若問之何也闇昧之人固固心結聰明猶不達不重反覆見曉勅者猶矇矓冥冥復亂天師道故敢不反覆問之也善哉子言也諾安坐為諸群真人具說之夫正言正文正辭迺是正天地之根而安國家之寶器父母也而天下凡人萬物所受命也故當力正之也唯唯願聞正言正文正辭為天地根國家寶器凡民萬物所受命決意意真人已比比受此語吾文書中悉病疾浮華邪言

子迺復重問之何也愚生而隨俗為愚積久不知邪止所在故不重見丁寧解之殊不解也然子欲知其審實也俗人俱言善善而共力行之而災殊不除去者即不善之文不善之言之亂也俗人言此可耳不能善也而按行之反與天相應災日除去者即正文正言正辭也內獨與天相應得天地心意之明微也是故正言正文迺見是正天地之心也故言悉正文悉正辭悉正而帝王按而行之下及小民莫不俱好行正天地迺為大正四時五行萬物一旦皆各得其正日月三光守度各得正也國家大安無憂迺到于神負不老之方賜之奇物善應悉出姦猾妖惡悉滅絕凡民各得保其家而竟其天年萬物悉得長老終各以時也是即正言正文正辭之為天地根而國家寶器父母民萬物之命大明效也真人知之耶唯唯可核哉可核哉天地之根國家寶器命及在此行子可謂曉事之生知之矣是故天遣吾下悉考正之也天地開闢以來行正言正文者天地常為其大喜說

故常善行邪言邪文者天地常為其大怒不
悅喜故常凶不安而多危亡也俗人不知是
為天地大病而亂帝王治也而下愚之士反
共巧工下作篇記習邪言邪文以相高下以
欺其上而汙天正法亂天正儀是乃天之
怨地之大咎也而國家之大賊也今乃得天
怨地咎國家賊而日共行之其治安得乎哉
今天師責此邪言邪文罪之何一重也噫真
人其愚耶今人而共以邪言邪文共亂天地
天地迺為其常有病是非天之怨咎耶比若
人常行病人害人亦怨咎之不耶唯唯是
故為天怨地咎明白矣今邪言邪文邪辭迺
已共欺其上危國家其治常失天心其年命
不增為之絕者前後非一人坐之是非國家
之大賤邪諸真人知之不唯唯下古人多愚
或有見天文反言不若此言是純復國賊之
長也天地之大怨咎也民之大害萬物之烈
鬼物也德君慎毋用其言也用其言者天怨
不正當為身深計遠慮思其患害以長自安
天迺與德君獨厚故為其製作可以自安而

保國者也真人知之耶唯唯行于已大覺矣
自慎自慎天威不可犯也唯唯戒真人一言
自是之後德君詳察思天教天文為得下吏
民三道所共集上書文到八月拘校之分處
為三部始校書者於君之東已一通傳校於
君之南已再通傳校於君之西已三通傳校
者棄去於君之北校者各異處不得相時也
何乎願聞之然相賸復有奸有可弊不實復
為欺如是復忿天地為怨咎為國之大賊天
地惡人使帝王治亂故異其處使三校之當
其實核之也以解天心以安王者治也何必
始校於君之東東者天氣有心而仁也校源
事者當用心詳務力仁以稱天地而念欲安
帝王也故於東也仁者以行當明察之故傳
於君之陽也已明察當以義斷除之有功者
因記有功無功者使記無功以為行狀已者
藏於君之北幽室而置之以是知天下人行
知善惡勿去也故德君按行是名為大神人
悉坐知天下之心凡變異之動靜也真人知
耶可核哉可核哉子知核畏天談于長活矣

唯唯是故自是之後長吏不復言行狀行狀
見於是因以此為行狀故德君迺安枕而卧
無憂也予知之耶唯唯天戒校書脫一事者
咎三十事者咎三百百事者咎三千德君
使退之勿復仕也此人乃輕忽事是怨地
咎國之大賊夫怨咎與賊不可與久共事必
且忿天地故當疾去之善哉善哉戒真人一
大要吾書文道所以從上到下無窮也悉愛
正言正辭正文者吾迺深受天勅而下也誠
知天愛是正言正文正辭所以大疾是邪言
邪辭邪文者正知天地大怨咎之以是勅吾
使吾下校去是怨咎與賊以安有道德之國
以長解天地開闢已來承負之譴使害一悉
去得休使正氣悉得前治也然後六方極八
遠皇天平氣悉一旦自來子知之耶唯唯是
故吾文者純天語不失殊分也天疾是邪文
故吾疾之也天愛是正文故吾愛之也故吾
之為道悉守本而戒中而棄末天守本故吾
守本也天戒中故吾戒中也天棄末故吾棄
末也吾之為文也迺與天地同身同心同意

同分同理同好同惡同道同路故令德若按用之無一誤也萬萬歲不可去但有日章明無有冥冥時也但有日理無有亂時也但有日善無有惡時也但有日吉無有凶時也故號為天之洞極正道迺與天地心相抱故得其上訣者可老壽得其中訣者為國輔得其下訣者可以常自安行吾語辭小竟疑者迺復來問之唯唯請問無故脫誤事一正管三十手善哉子問也天使子言耶然夫數者起於一十而終是誤脫一事即其問一之本也脫誤不實復為歎則復為天怨地咎國家之大賊也管十者以謝於地管十者以謝於帝王天地人各十合這為三十也管此以謝過以解天怨地咎帝王之賊也迺天地喜悅神祇戰怒也本天地所以常亂而戰怒者本由考實文書人言不詳多誤故生此況文承負之厄也今復不詳且復如此故當管之也不以故人也迺以正事也今已集議實核口口迺石上之尚復集實核口口迺石下之則名為上下已俱實矣如獨下口口上不實固

無益也如獨上口口下不實亦無益也上下俱為實迺天氣平也下實上不實為上克下下復自克力為善無益天怒復發矣如上實下不實為下克上地怒復發矣上下盡已實帝王不以意平理之則四時五行六親之神更六宗之氣中和戰怒凶氣復發矣雖力使三五行文書正天下之言及文而自不力平之無益也故吾迺承天心為上皇德君作化不敢失天心也故悉拘天法以天地象為經隨陽為正順四時五行為令萬世不易也子知之耶唯唯愚生謹以覺矣甚畏天法子知之之已長吉矣戒其人一大要言也夫拘按文書法毋但言其神文如其書文言如此以為真也是名為真文也言事獨無本柄耶何以言如此哉不禁其有也但問其言之意當得其意迺事可明也如不說其意以何能得知之乎哉故當問其解決意不者不可用也名為真治子欲樂知其意比若人語必有本當有可由而起不可但言東公言以立事也夫人證立事者悉有本安得但空設偽空言

乎故亦凡事者皆當以其實有據迺可立事也子欲得知其大效明微比若吾為德君化法皆以試立應為效言也行之而不應即偽言也行之而不應即為天也夫實說文與言矣比若此矣安得空立徵而言其文言而無說乎愚人或有拘何各神文言如是也但可以解難拒窮之辭耳夫神文何雄或獨有意但傳言其文不居一卷也獨自傳選相說人不深得其訣意反但以拒難救窮言東人言以是自明實非也皆為失說意令至道德辭不得通達者悉坐是子知之乎唯唯愚生謹已覺矣然子如此而不覺則遂迷矣是故按吾書考文及人辭者皆竟問其意何以得其說者以類聚之迺後天下之文及辭言且一窮竟天道法可睹矣善惡之辭得通矣善哉善哉行吾之道見於此真人自上下思之思之悉更相微明則無不解矣天下之事無不畢矣大道得矣天地悅矣德君長安矣天下俱同口皆曰善哉無復言天治迺復得天地心意故曰安舉事得凡人之心故天下無

復言真人知之耶唯唯行辭小異有疑復來問唯唯

右天怨地咎國之害微立洞極經文

太平經卷之九十一

太平經卷之九十二

訓三

三光蝕訣第一百三十三

請問天之三光何故特蝕邪善哉子之所問是天地之大怨天地戰鬪不知其驗見效於日月星辰然亦可蝕亦可不蝕咎在陰陽氣戰鬪何故戰鬪乎陰陽相新遠諍勝負夫陰與陽本當更相利祐共為和氣而反戰鬪悉過在此不和調如使和調不蝕亦當不蝕邪然大洞上古最善之時常不蝕後生彌彌共失天地意遂使陰陽稍不相愛故至於戰鬪子以吾言不然也子使德君案行吾文盡得其意戰鬪且止小得其意小止半得其意半止如不力行固困耳請問夫日月蝕以何時運相逢邪噫子其愚哉真人正復更發天怒今真人以何知為時運邪惡生見其同處也冥冥哉子之心也其暗冥何劇也審若子言運相逢也何故於一年之間日月蝕無解矣或連歲不能運何以然帝王多行道德日月為之不蝕星辰不亂其運何以然哉又天性陰陽同處本當相愛何反相害耶又陰陽

本當轉相生轉相成功何反相賊害哉是子之愚也子欲知其實比若人矣人常相厚又相親一相得達過大喜則更相祐利相譽相明及其素相與不比也卒相逢便戰鬪大不比鬪死而已小不比小鬪可駭哉可駭哉愚生已解矣請問今日乃太陽火之精神也月乃太陰水之精神也今水火不同處自相遭逢則相滅何謂也不比邪善哉子言得其意然水火各以其道守其行皆相得乃立功成事比若五行不可無一也皆轉相生成子欲知其實也比若五藏居人腹中同一處心乃火也腎乃水也豈可為同處而日相與戰鬪相蝕邪子寧解知不乎唯唯愚生已覺矣是故和平氣至三光不復戰鬪蝕也三光不相蝕乃後始可言得天地之心矣以是為證故欲自知優劣行道德未俱觀此天證而聚眾文言同處相蝕是者但記同愛之文未深得之意也正使有神文言天乃未深見其情實也子知之耶唯唯行子已覺矣吾文出之後帝王德君思此天意勿忘此言此言所以